

30,000 sukarelawan bantu MAHA 2016

SERDANG 22 Nov. - Hampir 30,000 sukarelawan akan menurunkan khidmat dan tenaga dalam membantu menjayakan penganjuran Pameran Antarabangsa Pertanian, Hortikultur dan Agro Pelancongan Malaysia (MAHA 2016) dari 24 November hingga 4 Disember ini.

Menteri Pertanian dan Industri Asas Tani, Datuk Seri Ahmad Shabery Cheek berkata, program kesukarelawan itu adalah yang pertama kali dianjurkan untuk acara dwitahunan MAHA dalam usaha menggalakkan penglibatan golongan belia dalam aktiviti seperti itu.

"Mereka terdiri daripada mahasiswa Universiti Putra Malaysia (UPM), peserta Program Mahasiswa Turun Padang (Mantap), pelajar luar negara, peserta 1M4U dan sukarelawan Standard Chartered Bank," katanya kepada pemberita selepas Program Pencarian Sukarelawan MAHA 2016 di UPM di sini, hari ini.

Beliau berkata, antara khidmat yang akan melibatkan sukarelawan dikenali Agro Troopers itu adalah sebagai penunjuk arah kepada pengunjung, menyediakan bantuan kepada golongan kurang upaya dan menyebarkan maklumat dan risalah berkaitan MAHA.



AHMAD SHABERY CHEEK menyerahkan borang sukarelawan Pameran Antarabangsa Pertanian, Hortikultur dan Agro Pelancongan Malaysia (MAHA 2016) kepada para pelajar Universiti Putra Malaysia (UPM) di Bangunan Pentadbiran UPM, Serdang, Selangor, semalam. - UTUSAN/FARIZ RUSADIO

"Kita harapkan dengan adanya program sukarelawan Agro Troopers ini, ia dapat mewujudkan satu kumpulan belia yang sentiasa menyokong usaha-usaha dan program-program yang dilaksanakan oleh kemente-

rian," katanya.

MAHA 2016 yang akan diadakan di Tapak Ekspo Pertanian Malaysia (MAEPS) Serdang dijadual dirasmikan oleh Perdana Menteri, Datuk Seri Najib Tun Razak. - BERNAMA